

Per memoria da

## Benedetg Monn-Monn, Sedrun

3. 6. 1977  
III 44

(Corr.) Sonda endamaun, ils 9 da matg 1977, annunzia il zenn grond da sogn Vigeli cun sia vusch profunda la mort da nies car Benedetg Monn-Monn. Ins saveva che sia sanadad seigi sgurdinada. Maina sminava ins ch'el fagessi aschi spert da bandunar il terrester.

Avon in onn han simtoms d'ina malingna malsogna dau sinzur e pretendiu ina pli liunga dimora el spital. Retornaus a casa empau serestabilius, carteva el da puspei saver reprender la lavur cun l'arrivada dalla primavera che porta nova veta e gronda speranza. Ei sesvegliava en el il desideri da cultivar la cara tiara ed il dultsch ardiment d'ira cul muvel a mises. Vana speranza! Il mal, che haveva catschau profundas ragischs, ei serabalaus aschi aggressiv ed ha terminiau il viadi terrester da Benedetg Monn en siu 61. onn. Tgi pli baul, tgi pli tard, tut tenor il camond da Diu. Bein preparaus en resignaziun cristiana e confortaus cun la vivonda dalla veta perpetna eis el sedurmentaus — ruasseivel sco el ei adina vivius — en paisch cun Diu e cul mund.

A nus ha el fatg lartg. Ei maunca il bien bab da famiglia. Nies vitg ei vegnius per in pur temprau e da siu fatg pli paupers. Il preziau e premurau commember dalla societad da musica e dil chor da baselgia ei buca d'anflar pli ellas retschas da quellas uniuns. La regurdientscha lai anavos fastitgs d'in um ruasseivel, sempel e gest che ha maina vuliu offender zatgi.

Cura ch'in carstgaun banduna nus per adina, sepresenta sia veta avon nies spért. Ins lai aunc reviver il decuors da quella. Naschius ei il Benedetg ils 29 da zercladur 1916 — sco fegli da Vigeli e Barla Monn-Berther — a Sedrun. Gia els onns d'affonza ha el sentiu la grevezia dalla veta, perdend cun 9 onns la cara mumma. La sort dils orfans ei mai stada leva. La carezia dalla mumma sa negin remplazzar. Sco tierz dils otg affons, restai anavos, ha ei tuccau ad el a bun'ura da ver empau quitaui



per ils fargliuns pli pigns. Per lezs *cis* el staus in bien frar. Carschius si en in ambient puril, ha el empriu d'appreziar e carezar il tschespet. El ha fatg cun tschaffen ed ardiment il pur. Igl onn 1947 va el da l'autra vart dil Rein per sia cumpogna dalla veta e marida l'Anna Monn, da Surrein. Ord quella lètg sortan treis buobs e treis mattatschas. Ils geniturs han giu bien quitaui e dau ad els in bien fundament cun lur exempla da lavur ed oraziun.

Gronds merets ha il Benedetg raccoltau per las uniuns culturalas da nossa val, alias qualas el ha apparteniu entochen la mort. Varga 40 onns eis el staus commember dil chor da baselgia e gest tons onns attaschau alla societad da musica. Quei dat ina summuna da sacrificis, encorunada d'ina pluna da merets. El ei buca staus in commember mo da fassada, na, sia premura e stedia participaziun als exercezis lain anavos in bien exempla als auters. En cumpignia da ses camerats appreziava el il saun humor. E rir saveva el propri da cor, aschia ch'ins steva bugen en sia vischinanza.

Il di da sia sepultura ha in grond pievel documentau tras sia presenza la simpatia ed attaschadad al defunct. Il chor da baselgia e la societad da musica — quasi completa — accumponnan lur fideivel e premurau camerat cun la bandiera en malencurada dalla casa paterna alla fossa. Quei viadi, ch'il Benedetg ha fatg tontas e tontas ga cun la posauna sut bratsch per ira als exercezis, vegn remunerlaus da ses amitgs cun in marsch da

malencurada. Ils seniors della societad da musica, Giusep e Lucas, che ein entrai en quella cul Benedetg igl onn 1934, prendan comiau da lur camerat, rendend la davosa honur cun in tschupi da fluras primavauñas.

En baselgia honoreschan cantadurs e cantaduras il fideivel commember cun il cant funeral. Il survetsch divin, celebraus da nies preziau augsegner sur Giusep Cathomas, assistius da sur Giusep Durschei e sur Benedetg Baselgia, han rimnau in grond pievel. La baselgia ei fullanada. El riug patern da bara engrazia nies augsegner

al defunct — en num dil chor da baselgia e dalla societad da musica — per igl engaschi enteifer quellas uniuns. El muument che las bandieras dil chor da baselgia e dalla societad da musica sesbassan — sut ils tuns lamentonts, sur la fossa, lu consoloschan nus ils plaids digl augsegner: «Ti vas dalla mort alla veta perpetna». En memoria e renconuschiéntscha lain nus rugar per sia olma. Cun ils davos plaids dalla canzun, cantada dil chor da baselgia, predein nus comiau dad in nunemblideivel amitg: «Stai bein amitg, stai bein, speranza in di nus sevesein».